

朝野類要 宋趙升著
過庭錄 宋范公偁著

進步書局校印

朝野類要提要

宋趙昇撰凡五卷體例近蔡邕獨斷而十四類逐條解釋使讀者不致墮五里霧中尤見婆心不然如把見混試破白合尖之類雖博洽之士亦有索解無從者微是編條分縷析典章制度不幾無足徵乎沾丐後人厥功良偉吾愛之重之

原序

僕自幼入京都觀公朝儀刑政事名理及聞夫搢紳間衆所稱謂皆蒙然無所知識求之於書甚為簡畧或無載紀後歷聞諸師友老先生指誨歲月寢久雖曰強記終不如弱文遂寄之毫楮姑目曰朝野類要逮今歲自口江歸舍而舊本□□□間為鼠蠹之餘棄之可惜又以好事者來需第須別錄既病且懶遂移書札之費增而鉸之于木不獨有以應酬亦足以廣四方之見聞惟其宮禁內職不復紀錄非曰缺文實不敢也觀者當察焉端平丙申重九文昌趙升向辰識于雙桂書院

朝野類要目錄

卷一

班朝十二事

典禮二十事

故事三十三事

卷二

稱謂三十九事

舉業四十八事

醫卜六事

卷三

入仕十二事

差除十二事

陞轉十一事

爵祿九事

職任十事

卷四

法令七事

文書三十四事

政事四事

雜制十一事

帥幕十七事

卷五

降免十五事

退閒四事

憂難九事

餘紀十六事

朝野類要卷一

宋趙升撰

班朝凡十二事

御殿

本朝殿名最多。如常朝則文德殿。五日一次起居則垂拱殿。遇忌前假及詞祀日分則御後殿。正旦冬至及聖節稱賀大禮奏請致齋則皆大慶殿。賀祥瑞聖壽賜宴則紫宸殿。宴對蕃使則長春殿。試進士則崇政殿。若賜宴則集英殿。郊祀稱賀則瑞誠殿。諸班直推梁子則射殿之類。又有內殿如萬歲復古週英藥珠定華福寧睿思殿。今上皇帝建北宮後宮之殿又不一也。緝照殿之類

朝儀

趨朝之儀如出入不由端禮門不端簡。朝堂行私禮。交互幕次。語笑諠譁。殿門內聚談。行立失序。立班交語。相揖無故離位。拜舞不如儀。穿班仗出之類。皆謂失儀。即門門彈奏有責。

常朝

今之所謂常朝蓋正殿也。又名垂拱殿。大凡殿名遇禮例合御某殿則臨期設牌。常朝則自九月中旬。至來年五月中旬。

後殿

常朝值雨則改御後殿。

六參

又名望參。謂一五日之常禮也。在京大小職事及不釐務官。赴赴望參。不得連三次請假。

輪對

自侍從以下。五日輪一員上殿。謂之輪當面對。則必入時政。或利便劄子。若臺諫則謂之有本職公事。若三衙大帥。謂之執杖子奏事。

內引

內殿引見則可以少延時刻。亦或賜坐。亦或免穿執也。

待漏

宮內之前待漏院。所以俟候宮門開。及閣門呼報排班。則穿執而入也。又名待班閣。

子。

正謝

凡宰執侍從命下之日。即時赴新局。當時便回。却上辭免表奏之後。朝命不允而已。受方始正行朝謝。

舞蹈

謂舞蹈有七拜。大起居。

裏見

有罪之人朝見。如與免把見。則仍舊穿執。謂之裏見。唯加武士簇擁也。

把見

軍頭引見司等子。驅擁。有罪之人朝見也。向來紹興末年。四川宣撫司管押到招捉北界偽知虢州完顏守能。知商州折可直。嘗如此。蓋唐以來朝見之儀有五。此其一也。今大禮殿。及咸署引疎。決。即亦用軍頭司擁見。

典禮凡二十事

郊祀大禮

京城之外。大祭祀皆謂之郊祀。如三歲南郊圓丘時。北郊祀后土。皇地祇。明堂中謂之明堂大禮。

五使

凡大典禮皆有之。如郊祀明堂。則有大禮使。禮儀使。儀仗使。鹵簿使。橋道頓遞使之類。山陵亦有總護。按行。覆按。修奉。橋道頓遞使之類。又有修奉都護。皆大臣帥座為之。

鼓吹

禮寺之太常樂也。

警場

大禮等辨嚴也。皆用上軍及衛仗司為之。

宿衛使

駕出合經宿。皆有宿衛使。向來駕詣慈福宮等。亦有之。昔日親征。則有御營宿衛使。

習儀

凡有大典禮。習儀。如郊祀大禮。習五輅肆赦。聖節。習上壽儀。及臨安府教樂之類。

冊寶

奉上尊號冊寶。亦有奉上冊寶。使用太常儀。伏鼓吹也。凡玉冊則全寶。所謂冊者。條玉爲之。紅線相聯。可以卷舒。字皆金填之。或謂玉以砮石代之。所謂寶者。印章也。並文思院供造。

親饗

車駕朝饗太廟也。其典禮類郊祀。

朝獻

四孟之月。駕詣景靈宮也。自神廟朝建此。如在恤制內。則權止。

分獻

凡三歲大禮。有大臣亞獻。終獻之外。衆天神則在壇下分獻。其餘神。則差官往各處行禮。

奏告

凡有典禮祈禱。皆差官奏告天地宗廟社稷五岳四海等處。

致齋

行祀事之官。預先于本局致齋。謂不治事。以謹潔其身也。

受誓戒

三歲大禮。干預行事官。皆質明。赴尚書省受誓戒。然後致齋。

恭謝

大典禮之後。車駕詣景靈太乙兩宮。行恭謝之禮。

分詣

四孟朝獻。如值雨。及有事故。或第二日值雨。皆命宰執分詣諸殿行事。

幸學

車駕幸太學。則有恩例。蓋古之養老尊賢之故事。

釋奠

二月上丁日也。凡學官并祭官大常禮官。即官皆赴太學大成殿。同諸生行禮。亦分為初中終三奠。用太常樂。八月同。

降香

凡祈禱晴雨。皆降御香。乃內侍省掌其事。差快行賫送。重則差內侍供奉官。

避殿損膳

昔時水旱祈禱未應。并天變星象邊鄙未寧。則聖上有避正殿減常膳之謙禮。

輟朝

凡大臣等薨。皆有禮例。特輟視朝。三日或五日。

故事凡三十三事

八寶

自秦得和氏之璧。以為傳國玉璽。其文曰。受天明命。既壽永昌。後子嬰捧以降高祖。于軹道者是也。在漢則符璽令掌之。增為六璽。至晉惠帝北征。亡失六璽。石季龍得之。遂改其文曰。大命石氏。迨唐亦有符寶。即而五代唐末帝。遭亂攜以自焚。故郭周重造八寶。而以天下傳本朝。謂受命之寶。鎮國神寶。天子之寶。皇帝之寶。天子行寶。皇帝御寶。天子信寶。皇帝信寶。且各有所用。如受命之寶。惟封禪用之。其他各朝。增置殿寶。不在此數。

大朝會

本朝禮制。有元日大朝會。如古之諸侯述職也。凡監司帥守。悉赴正旦大宴。鄉貢進

士亦預焉。諸道之進奏官亦預焉。蓋進奏官乃唐之藩鎮質子。留司京都承發文字。如今之機宜。故謂之候邸。

鎖院

凡言鎖院者。機密之謂也。故試士撰麻。皆如此。試士則所差官預先入院議題。有司排辦。撰麻則全番或半番快行。節次往學士宅第傳宣。俟傳宣快行來足。學士上馬朝服修帽。隨簇入院。造敕頭尾則亦然若別有直宿學士。或直院則出避之。當夜依宣撰述。如不可行者。繳奏之。謂之封還詞頭。若可行。則撰畢進呈。關報閣門宣詞令舍人。令閣門宣詞令舍人鎖宿且當晚御史臺閣門報明日宣麻。則文武百寮赴文德殿聽之。如不可行。則又有執政不押麻之例。即臺諫得以執奏矣。除拜大臣。則上旬。后妃中旬。餘官下旬。俗謂下旬刺麻非也。或偶置之耳。

迎駕

車駕出幸。經由在京去處。凡百司局務官吏僧道。在百步之內。並迎駕往回起居。若免拜。則祇奏聖躬萬福。山呼。若免起居。則不排設綠亭香案也。

駕頭

孔毅父談苑云。駕頭者。祖宗即位時所坐也。皇朝類苑曰。謂之正衙法座。香木為之。加金飾四足。墮其角。其前小偃。織藤冒之。駕頭至則宣贊喝引迎。駕者起居也。又沈存中筆談謂是中貴官。捧月樣杌于馬上。今係閤門宣贊舍人。

躬請

車駕每春天。或節序。躬請北宮遊幸。回則從駕官。多是戎裝。而用御馬院動樂。今主上寶慶間。躬請恭聖仁烈太后。宮中宴賞是也。戎裝謂免穿靴服衫帶。若武臣則服免袍。御馬院掌聖上所乘之馬也。

所謂驥驎院。教駿營所掌者。乃常朝并從駕者馬匹也。如唐之立仗馬。

教坊

自漢有琵琶箏篋之後。中國雜用戎夷之聲。六朝則又甚焉。唐時併屬太常掌之。明皇遂別置為教坊。其女樂則為梨園弟子也。自有教坊記所載。本朝增為東西兩教坊。又別有化成殿鈞容班。中興以來亦有之。紹興末。臺臣王十朋。上章省罷之。後有名伶達伎。皆留充德壽宮使臣。自餘多隸臨安府衙前樂。今雖有教坊之名。隸屬修內司教樂所。然遇大宴等。每差衙前樂權充之。不足。則又和催市人。近年衙前樂已無。教坊舊人多。是市井歧路之輩。欲責其知音曉樂。恐難必也。

等子

軍頭引見司等子。舊是諸州解發強勇之人。經由遞傳至京師。今則只取殿前舊司捧日等指揮人兵揀為之。故令于等子年勞。授諸州排軍受事人員之職。出職之日。舊皆詣都進奏院行謝。蓋奏院轄遞鋪故也。等子之上。謂之忠佐軍頭。皆由百司人兵親兵及隨龍人。年勞陞為之。或幕士帶之。

金雞

大禮畢。車駕登樓。有司于麗正門下肆赦。即位金雞竿盤。令兵士捧之。在京係左右軍百戲人。今乃瓦市百戲人為之。蓋天文有天雞星明。則主人間有赦恩。

聞喜宴

在京則賜及第進士。宴于瓊林苑。中興以後。就于貢院。

曲宴

有旨內苑留臣下賜宴。謂之曲宴。與大宴不同之義也。

聖節

國朝故事。帝后生辰。皆有聖節名。後免之。只名生辰。惟帝有節名。蓋自唐明皇千秋。

節始也

進香

北宮聖節及生長必前十日車駕詣殿進香。

滿散

滿散者終徹也。每遇聖節生長宰執赴明慶寺預先開啟祝壽道場。至期滿散畢。賜宴。

曝書

每歲七月七日。祕書省作曝書會。係臨安府排辦。一應館閣並帶貼職官皆赴宴。惟大禮年分及有事則免。

聖祖

真宗皇帝尊九天司命天尊。為聖祖天尊大帝。蓋倣唐尊老君故事也。其詳載于國史。又祕書有聖祖天尊大帝降臨記。

諸節

自唐以二月一日為中和節。國朝因之。以正月三日為天慶節。景德五年正月四日

為開基節。周顯德七年正月四日。太祖皇帝登位。四月一日為天祺節。大中祥符元年四月一日。天書降。六月六日為

天貺節。大中祥符三年六月六日。天書降。七月一日為先天節。後唐天成元年七月一日。聖祖軒轅皇帝降。十月二十四

日為降聖節。大中祥符五年十月二十四日。天書降。是日禁屠宰刑。著為令甲。

天慶觀

諸州皆置建之。所以奉聖祖天尊大帝。

報恩光孝寺觀

高宗皇帝中興以來。令諸州軍。各建置報恩光孝寺觀一所。追崇佑陵香火。

土貢

諸州歲貢土產之物也。即夏禹任土作貢之義。

宣賜

俗謂經由閣門有司。出給關照之物。為明宣賜。不經由有司。特旨賜之。則曰暗宣賜。

擊門

宰相動止。謂陰有攝禦神衛之。所以秦中歲時。記言宰相儀仗。有類牛頭形者。即是

也。今之宰執出入。其金吾。先以物敲擊門臺。謂報警攝禦神也。